

«La forz'idraulica è cumpetitiva»

La CIVC sa dosta cunter damain tschains d'aua

■ **(anr/fa) La forz'idraulica n'è sut las cundiziuns actualas betg deficitara. A quella conclusiun vegnan dus studis che la Cuminanza d'interess da las vischnancas concessiunarias grischunas (CIVC/IBK) han survegnì.** Proximamain vegn il cussegl federal a sutta-metter ina missiva davart la nova regulaziun dals tschains d'aua a la procedura da consultaziun. L'Associazion svizra d'economia d'aua (SWV) e gronds concerns d'energia pretendan ch'ils tschains d'aua vegnian sbassads per passa 60 per-tschient. «Quai avess consequenzas desastrusas per las regiuns alpinas, danunder che l'aua per las ovras electricas deriva», ha ditg glindesdi *Not Carl*, il president da la CI da las bundant 50 vischnancas concessiunaras grischunas (CIVC), a Cuira a chaschun d'ina conferenza da pressa. «Ils represchentants dals concerns d'energia pretendan ch'ils custs per la forz'idraulica sajan memia auts, malgrà il sustegn grazia a la strategia d'energia federala, e ch'ins stoppia perquai pli che schmezzar ils fits d'aua», ha'l cuntinuà, «perquai essan nus vegnids activs.»

Laschè far duas expertisas da perits independents

La CIVC ha survegnì da las interpresas BHP Partner da Turitg ed a l'enerprice Partner AB a Root studis che han examinà co ch'i stettia propi cun la rentabilitad da l'energia idraulica. A l'orientaziun dals meds da massa, nua ch'igl eran pre-

schents sper Carl er il vegl cusseglier naziunal *Rudolf Rechsteiner* da Basilea e *Gilbert Truffer* da Visp, el è deputà al cussegl grond vallesan. Els trais han preschentà ils resultats dals studis: «Auter che pretais dals concerns d'energia na lavuran las ovras idraulicas svizas betg da maniera deficitara, ils ultims 20 onns ha

fatg l'economia d'electricitad grazia a las ovras idraulicas 30 milliardas francs gudogn», han els cità or da las expertisas. Ils partenaris han fatg ina proposta.

Stgaffir ina «reserva strategica»

«Durant ils ultims dus envierns hai dà difficultads cun il provediment d'energia

perquai ch'ils gestiunaders da las ovras idraulicas han vendì da maniera anticipada las reservas d'energia dals lais d'accumulaziun», ha ditg Carl. Il motiv eran buns pretschs sin il martgà. «Per fortifigar la segirezza dal provediment d'energia e per avair l'energia necessaria per sa participar al martgà d'energia interna-

ziunal fitg rentabel cussegla la CIVC dal chantun Grischun al cussegl federal d'examinar la pussaivladad da stgaffir ina 'reserva strategica'.» Per evitar difficultads cun il provediment proponan las vischnancas concessiunaras grischunas da reglar giuridicamain in duair da mantener ina quantad minimala d'aua en ils lais d'accumulaziun e da la remunerar correspondentamain. «La CIVC sustegna la pretensiun dals chantuns muntagnards da betg tractar la dumonda dals tschains d'aua da maniera isolada, ma bain da la coordinar cun las lavurs dal parlament federal davart il nov urden per il martgà d'energia», ha menziunà Carl ed agiunt che la CIVC envidia las regenzas dals chantuns da muntogna d'examinar era ellas la pussaivladad dal model d'ina reserva strategica, sco proponì da las vischnancas concessiunarias grischunas. «La CIVC è pronta da porscher maun ad ina nova reglaziun dals tschains d'aua sche quella vegn remunerada da maniera correcta», ha ditg Carl. El ha agiunt che las vischnancas concessiunarias grischunas appelleschian als concerns d'energia da preschentar finalmain da maniera transparenta tut lur retgavs ch'els hajan cun la forza idraulica. «Ensem cun las vischnancas concessiunarias dad auters chantuns ed autras gruppaziuns interessadas vegn la CIVC, sch'i sto esser, er ad examinar in referendum per evitar ch'ils tschains d'aua vegnian diminuids nungustifitgadamain.»



Ils experts per energia idraulica, Gilbert Trauffer, Not Carl e Rudolf Rechsteiner (da san.), han preschentà ils studis e lur conclusiuns.

FOTO F. ANDRY